



Communicaziun a las medias

Data: 25.01.2012

La Svizra s'engascha per la protecziun da las minoritads naziunalas

Berna – Il Cussegl federal ha approvà ils 25 da schaner 2012 il terz rapport da la Svizra davart la Convenziun da basa dal Cussegl da l'Europa per proteger las minoritads naziunalas. Quests ultims onns han ins cuntanschì megliera-ziuns signifitgantas en quest connex. Dentant èn pussaivels anc ulteriurs progress, surtut pertutgant la situaziun dals viagiants en Svizra.

La Convenziun da basa per proteger las minoritads naziunalas è vegnida ratifitgada da la Svizra l'october 1998. Ella è entrada en vigur en favrer dal 1999. Questa Convenziun da basa dal Cussegl da l'Europa concerna las minoritads linguisticas tant sco autras gruppas minoritaras da la populaziun svizra sco ils viagiants e las communitads gidieuas.

Il terz rapport da surveglianza, ch'il Cussegl federal ha approvà, resumescha la situaziun actuala da las diversas minoritads naziunalas e preschenta las mesiras iniziadas dapi il 2009 da la Confederaziun e dals chantuns per realisar las propostas fatgas a basa dal ciclus da surveglianza precedent. La nova Lescha federala davart las linguas naziunalas e la chapientscha tranter las communitads linguisticas, entrada en vigur l'onn 2010, ha gia già divers effects positifs per la situaziun da las personas ch'appartegnan a las minoritads linguisticas. Novas furmas da subvenziun vegnan realisadas per projects linguistics, surtut pertutgant l'intermediaziun da competenzas linguisticas en il rom da l'instrucziun e da las retschertgas deditgadas al plurilinguisssem.

Tranter las minoritads reconuschidas da la Svizra en il rom da la Convenziun da basa, han ils viagiants svizzers las pli grondas difficultads. Ina preoccupaziun resta la mancanza da plazzas da dimora e da transit en Svizra per quels tranter els che vivan anc nomadicamain. Quai pericletescha in element essenzial da lur identitad culturala. Malgrà diversas acziuns positivs ed ina conscienza creschenta per quest problem tar divers chantuns, na s'è la situaziun betg megljerada fundamentalmain quests ultims onns.



Il rapport statal è vegnì elavurà consultond divers uffizis federals, ils chantuns, las conferenzas dals directurs chantunals e las organisaziuns da las minoritads pertutgadas. Per l'emprima giada è quest rapport er vegnì translà en rumantsch. El po vegnir telechargià sin las paginas d'internet dal Departament federal d'affars externs (DFAE), la versiun rumantscha sa chatta sin la pagina tudestga.

La Convenziun da basa per proteger las minoritads naziunals è vegnida approvada dal Comité dals ministers dal Cussegl da l'Europa il 1. da favrer 1995. Ella è l'unic instrument multilateral giuridicain impegnativ ch'è deditgà a la protecziun da las minoritads naziunals. Ella cuntogna essenzialmain disposiziuns programmaticas che defineschan las finamiras ch'ils stadis da la convenziun ston s'engaschar da realisar per proteger las minoritads naziunals.

Ulteriuras infurmaziuns:

Convenziun da basa per proteger las minoritads naziunals, 3. ciclus da surveglianza: <http://www.eda.admin.ch/eda/de/home/topics/eu/euroc/coeusw/coswtr.html>

Adressa per dumondas:

Infurmaziun DFAE
Chasa federala vest, 3003 Berna
tel.: +41 (0)31 322 31 53
info@eda.admin.ch